

Йўлдош Жумаев

**Бир кун мени
севиб қоласиз**

Шеърлар

*Тошкент
«Янги аср авлоди»
2007*

84(59)6-5

Сўз сеҳри. У мисли кўрилмаган куч-қудратга эга. У орқали яратилган ижод намуналари эса ҳақиқат ва адолат жарчиси бўлиб одамларни бедорликка чақириши, виждонини уйғотиши мумкин. Йўлдош Бобожон шеърларида ҳам Ватан мафҳи, она табииат, она, аёл сиймоси, инсон тақдири тараннум этилади.

Хукмингизга ҳавола этилаётган шоирнинг навбатдаги шеърлар гулдастасидан таркиб топган тўпلام ҳам сиз азизларга манзур бўлади, деган умиддамиз.

HD 33450
291

ISBN 978-9943-08-195-6

© Йўлдош Жумаев. «Бир кун мени севиб қоласиз».

«Янги аср авлоди», 2007 йил.

2007/61	Alisher Navoiy nomidagi
A5346	O'zbekiston M.

ГҶЗАЛ ШЕЪР ҚАЙҶУСИ

Йиллар ўтаверади. Ёшимизга ёш қўшилиб, фикримиз, ҳаётга муносабатимиз ҳам вазминлаша болади, лекин болаликни, қишлоқда ўтган, ота-она бағридаги беғубор дамларни, кўча чангитиб юрган кезларимизни, илк муҳаббат изтиробларини эслаганда қалбимиз қайта-қайта ёшаради. Ўтган тотли онларни ёдга олиб, беихтиёр жилмайиб қўямиз. Чунки меҳр оғушидаги ўша соғинч дамларни ҳеч бир хотирага алмашиб бўлмайди.

“Бир кун мени севиб қоласиз” деб номланган шеърий китобчага кўз югуртириб шулар хаёлдан кечди. Ўша ғамсиз-ташвишсиз болаликка, биринчи муҳаббатнинг аччиқ лаззатига қайтгандек бўлдим. Китоб муаллифи — ҳаёт тажрибаси катта — Йўлдош Жума бир одамни шоирга айлантира оладиган кўнгил, шу кўнгилга жо бўлган хотира, армон, ҳавас, изтироб эгаси. Шу бетакрор олам унинг шеърларида акс этиб турибди.

Тилагимиз шуки, яхши шеър орзуси, шеър ҳаваси, гўзал шеър қайғуси Йўлдош Жуманинг қалбини ҳеч қачон тарк этмасин. Унинг келажакдаги ёзган-чизганларига янада теранлик, бетакрорлик ва бугунги ўй-хаёлларидай софлик, кўндан-кўп машаққатли меҳнат ортидан келадиган мукамаллик ошно бўлаверсин!

Салим АШУР



БИР КУН КЕЛИБ СЕВИБ ҚОЛАРСИЗ

*Мен аҳдимни бир ён ташладим,
Ё кимнингдир кўнглин ғашладим.
Тақдиримни шундай бошладим,
Мен ўзимни сизга бағишладим,
Бир кун келиб севиб қоларсиз.*

*Мен бир қизман соқов ва сўқир,
Қўлларим гул териб бахтимни тўқир.
Ҳақнинг ўзи мағфират ўқир,
Ўзимни сенга ташладим, тақдир,
Бир кун севгимни сезиб қоларсиз,*

*Ташламадим ҳеч кимга назар,
Ой ҳам мендан қилгандир хазар.
Менга биров бермаган озор,
Ишқ қалбимда қилмади бозор,
Сиз севгимга сеҳр соларсиз.*

*Сизга ёқмас, кимгадир ёқар,
Дарё ҳам бир қайрилиб оқар.
Садоқатим ишқ ўтин ёқар,
Бахтим шунда қайрилиб боқар,
Шунда мени севиб қоларсиз.*

*Тўйдан кейин севганим яхши,
Достон ўқинг мен учун, бахши.
Битта севги ҳаётнинг нақши,
Шундай қилсам бўларму яхши,
Унда мени излаб топарсиз.*



ЗУЛФИНГ БИЛАН ҲЙНА БИРПАС

*Анов тоғдан нари тоғда,
Эрта хазон бўлган боғда,
Мени қолдириб доғда
Юрак армонларим қолган.*

*Менинг қалбим яна ёнди,
Алам ёниб қалам олди.
Ҳижрон менга исён солди,
Ширин умидларим қолган.*

*Тақдир ёмон кулиб боқди,
Дарё тўлиб фиғон оқди.
Қалбимга бир олов ёқди,
Дард ўрнида доғлар қолган.*

*Сен ҳам мендек ўйлармисан,
Юрган йўлим бўйлармисан,
Дардинг айтиб сўйлармисан,
Орзу бўлиб ўйлар қолган.*

*Ойлар тўлса ўйласанг бас,
Ишқ ўтида бўлсанг сармаст.
Зулфинг билан ўйна бирпас,
Қўлларимнинг изи қолган.*



АЗИЗ ОНАЖОНЛАРИМ

*Куёшни аввалроқ кўрган,
Озор бермай жуфти ёнидан турган,
Иссиқ нон ёпиб, кулча пишириб,
Кўшни боласига биринчи берган,
Юртим эъзозлаган, Онажонларим.*

*Меҳрингиз доимо болангиз томон,
Ҳар бир сўзингиз бизга меҳрибон.
Ой ҳавас қилар сизларга ҳамон,
Юлдузингиз порлаган ўтса қай замон,
Юртим келинлари, Онажонларим.*

*Замона зайли деб тенг бўлмади ҳеч,
Эрта ётиб, кеч турмади ҳеч,
Ялламиз қадим, алламиз қадим,
Замондан орқада ҳеч қолмади кеч,
Олима, оқиласиз, Онажонларим.*

*Дунёда қайси давлат, қайси бир миллат
Онани эъзозлаб қурдирган қаср?!
Бибихоним, Моҳларойим, Зулфия асри,
Жаҳонни лол қолдирган Тоғ Маҳал қасри,
Шунчалар азизсиз, Онажонларим!!!*



ЧИРЧИҚ

*Азим Тошкентнинг мезбони Чирчиқ,
Жаннат бешиги, меҳмони Чирчиқ.
Ҳар томонда Жаннат сувидир Чирчиқ,
Меҳрибон мезбон, бағрикенг Чирчиқ.*

*Насиб этсин азим шаҳарлар —
Бухоро, Самарқанд, Хиванинг ёши.
Сувларингга салом берсам саҳарлар,
Эзгу ниятларим амалга ошар.*

*Дунёда денгиз сувлару ҳам сероб,
Сочинг тарайвергин дарёга қараб.
Кўзларинг тегмасин, сувларинг сероб,
Сувинг ичганлар ичмайди гулоб.*

*Чирчиқ сувлари — Сирдарё сеҳри,
Сувин ичганларнинг ошади меҳри.
Саратон чилласида баҳорсан, шаҳрим,
Жаннат сувларининг макони Чирчиқ.*



БУНДАЙ ДАВРОН ҚАЙДА БОР ЭДИ

*Қай замонда, қайси мунажжим
Бу давронни туш кўрган эди.
Қуриганди кетиб мажолим,
Қурт танамга уй қурган эди.*

*Олма пишиб тагига тушди,
Биров еса, биров хор қилди.
Ўз танасин ўзи емаса,
Бирин отиб, жуфтин тоқ қилди.*

*Туғиб берди биров боласин,
Алла айтди унга тасмада.
Авлодимда чиқиб оласи,
«Шурик» дейишарди ўзин боласин.*

*Бола келиб «пахан» демаса,
Нон, ош, сув ҳам йўқ эди.
Иймон, ислом ўзи бўлмаса,
Бундай даврон қайда бор эди.*

*Табаррук бўлди ўзбек дўпписи,
Зар тўнлар «пахан»нинг елкаларида.
Атлас, ипак, адрас унинг «хоббиси»,
Ўзбек куйларига ўйнар «ёлкада».*

*Бу давроннинг ўзи бўлгани йўқ,
Юрак яраланган отилмасдан ўқ.
Шаҳид кетганларнинг руҳлари алам,
Истиқболнинг қадрига етгин-да, болам.*



ХҰРЛИК КҰРМАЙЛИК

*Оқларингни эшитди фалак,
Орзулари ушалган элим.
Юрагингда армонлар лак-лак,
Авлодлари табаррук элим.*

*Қаторингдан норинг кетмасин,
Норинг кетганда оринг кетмади.
Юртни ташлаб ҳеч ким кетмасин,
Ғанимлар бор ҳали, кетмади.*

*Қорни тўқ-у, очлар ҳали бор,
Узидан бошқа ўйлар ғами йўқ.
Ҳали қалбимдан кетмаган ғубор,
Отам кўз ёшларин унутганим йўқ.*

*Замонлардан қолган ҳар чандиқ
Юрагимни минг бор эзади.
Тўларкан-ку ҳар уйда сандиқ,
Энди дунё кўриб, жаҳон кезади.*

*Мустақиллик аслида ҳурлик,
Бир халқ бўлиб бирлашса эллар.
Ҳеч замонда кўрмайди хўрлик,
Бир қалб бўлиб бирлашса диллар.*

БОРИ БИЛАН АЛЛОҲ АСРАСИН

*Бир мен эмас, чумолининг ҳаққи бор,
Даррандаю парранданинг уни бор.
Бўрилару қашқирларнинг уйи ғор,
Уйламагин бу заминда бир мен бор.*

*Кўнғизлар ҳам болам дейди гўнг титиб,
Асрар боласини тишларида беркитиб.
Ризқин терар туни билан ов кутиб,
Эгасиз қолмас бу заминдан сен кетиб.*

*Бу заминда фақат сенинг ҳаққинг йўқ,
Илонлар ҳам умидвордир, кўнгли тўқ.
Нишон қилиб безабонга отма ўқ,
Бирин отсанг бўлмайди-ку кўнглинг тўқ.*

*Сен қарасанг бир ўзинг томон,
Ҳақ яратган жониворлар ҳоли ёмон.
Денгизинг ҳам қуриб кетмоқда ҳамон,
Ҳаққа етармидинг сен қолиб омон.*

*Боғларингда булбулларинг сайрасин,
Оҳуларинг тоғларингда яйрасин.
Боринг билан Аллоҳ ўзи асрасин,
Бу заминга бергин юрак парчасин.*

ИСТИҚЛОЛИМ АБАДИЙ КЕЛДИ

*Истиқлолда қайта туғилдим,
Интиқоммас, истиқбол учун.
Бу кунгача қанча бўғилдим,
Билмай қандай яшамоқ кучин.*

*Кимлар учун ҳеч ким бўлмадим,
Кўз ёш тўкмай, йиғлаб тўймадим.
Отам дерди: — Бундан ўлмадим,
Сабабини энди ўйладим.*

*Яшашим керак яшамоқ учун,
Ҳур диёрим иқболи учун.
Бобом руҳин шод этмоқ учун,
Отасиз хўрланган, ҳам отам учун.*

*Мен ҳам дардим айтар кун келди,
Ой кулиб боққан ёруғ тун келди.
Ишонинг, истиқлол абадий келди,
Тушда кўрганларим ўнгидан келди.*

*Ўтган кунлар биз учун синов,
Мен ҳеч кимга бўлолмайман ёв.
Биров қабрига кирмайди биров,
Ғофилларга бу ҳам бир синов.*



УМИДВОР БЎЛИБ ЯШАЙМАН

*Умидвор бўлиб яшайман,
Қайтмас бўлиб кетдинг-ку ўзинг.
Сенсиз энди қандай яшайман,
Топилмадиму бир офиз сўзинг.*

*Муҳаббатиму меҳримни олдинг,
Ёшлигим баҳори, сеҳримни олдинг.
Юлдуз санаб мен қолавердим,
Вафосизим, мени не кўйга солдинг.*

*Умримнинг баҳори, ёзлари ўтди,
Гуллари уфурган созлари ўтди.
Наҳотки умрим ўтиб қазойим етди,
Қабоҳат ҳукмрон, садоқат кетди.*

* * *

*Баҳор алдансин қишга ишониб,
Саҳар ҳам алдансин булутли кунда.
Йигит алданмасин қизга ишониб,
Курган кунлари айланар тунга.*

*Баҳор ҳам гуллайди, эрийди қорлар,
Тонг ҳам отади кетиб ғуборлар.
Келин боғида хазон бўлди гулзорлар,
Баҳор ўтиб кетди, гулламай боғлар.*

*Гуллар хазон бўлди сенинг йўлингда,
Тунлар бедор бўлди сенинг йўлингда.
Тиллар бийрон бўлди сенинг йўлингда,
Ҳаммаси бир ён бўлди сенинг қўлингда.*

*Меҳр бир ён қолди, садоқат бир ён,
Алдамчи қиз қолди, қабоҳат бир ён.
Муҳаббат ўрнида маломат бир ён,
Йигит қалбида қолди оловли исён.*

ФОФИЛЛАРДАН ОГОҲ БЎЛИНГ

*Ватан учун жангга кирмай,
Ярадорсан, ёвни кўрмай,
Уттиз-қирқ ёшни кўрмай,
Чимилдиқни кўриб, ё кўрмай,
Эл бошига тўфон келди.*

*Зиё аҳли, оч кўзингни,
Ғофилларга айт сўзингни.
Мозийга қайт, оч юзингни,
Истиқболга бер ўзингни,
Унутмагин Чўлпон сўзини.*

*Ҳозир ҳам бор падаркушлар,
Ватан сотиб дилин хушлар.
Ғанимларнинг қўлин ушлар,
Ғофилларни йўлга бошлар,
Беҳбудийнинг кўзин ёшлар.*

*Қодирийлар ови бўлди,
Беғуноҳ отилиб маҳв бўлди.
Билиб-билмай бўйин бўлди,
Тўрингдаги гўринг қайда?
Ўз элида ғаним бўлди.*

*Биз билмаган шаҳидлар кўп,
Отишдилар қилиб тўп-тўп.
Исломинг бўлмаса, ўйла хўп,
Огоҳ бўл, ғаним уруғи ҳали кўп,
Огоҳ бўлган замон бўлди.*

... ЯРИМ ЙЎЛДА ҚОЛИБ КЕТДИ

*Совчиларни ғанимларим қайирдилар,
Тақдир бизни ярим йўлда айирдилар.
Мен ғарибнинг кўнглин хўрлаб бойирмилар,
Таним менда, руҳим сенда қолиб кетди.*

*Совчиларга кимдир сени сўқир дебди,
Яхши бўлса, куёв биздан чиқар дебди.
Тўнин силкиб совчилар ҳам уйга қайтиб,
Кулиб турган бахтим мендан олиб кетди.*

*Совчилармас, аслида-ку ўзим гумроҳ,
Юрагимни тингласайдим, қилмай оҳ-воҳ.
Энди менга қайси кўнглил бўлар ҳамроҳ,
Ҳамроҳларим менга алам солиб кетди.*

*Бошқасига кўнглил қўйиш қийин бўлди,
Севгисиз ҳам яшаш бир кун тайин бўлди.
Кимларгадир тақдир иши ўйин бўлди,
Менга қўшилиб бир бегуноҳ ёниб кетди.*

*Ёндирдилар, куйдирдилар, жисмим қолди,
Бир умрга айрилишдик, исминг қолди.
Юрак ёниб, сени деган қисмим қолди,
Бир бўлаги сени излаб қолиб кетди.*

МУҲАББАТИНГ СОЧИЛИБ КЕТДИ

*Менгача сен ҳам ягона эдинг,
Мени ташлаб кетмагин, дединг.
Бор меҳрингни тўкиб бердинг,
Муҳаббатинг сочилиб кетди.*

*Тилинг дилингни алдай бошлади,
Май ичиб кўнглинг хушладинг.
Мен йўқман, кимга ташладинг,
Муҳаббатинг тўкилиб кетди.*

*Баъзида ишқинг кўчада қолди,
Кўчада кимлар фар нигоҳ солди.
Сенга ўхшаганни йўлига солди,
Бегона қалбга тўқилиб кетди.*

*Мағрур эдинг гулга ўхшатса,
Қўлдан қўлга олиб ўйнатса.
Қалбин фақат сенга михлатса,
Ҳою ҳавас учириб кетди.*

*Кўчадаги бугун кўчага кетди,
Кимдир мени маҳлиё этди.
Бошқа бир ёр етаклаб кетди,
Менинг бахтим очилиб кетди.*

*Ишқинг фақат ёрингда бўлсин,
Муҳаббатинг уйингда бўлсин.
Бир меҳрга икки қалб тўлсин,
Сенинг муҳаббатинг сочилиб кетди.*

МОЗИЙГА ҚАРА

*Машраб ғазаллари бағримни эзди,
Бобурни ўқиб хаёлим тоғларни кезди.
Сизларни севишдан юрагим безди,
Ҳаёсиз юрманглар, сева олмайман.*

*Тарихни ўрганиб мозийни севдим,
Баҳор осмони, мовийни севдим.
Увайсийни ўқиб, Моҳларни севдим,
Улардан бошқани сева олмайман.*

*Ҳайёмни ўрганиб майдан ҳам кечдим,
Навоий учун боримдан кечдим.
Беқадр қолган севгимдан кечдим,
Яна қайтиб сени сева олмайман.*

*Яссавий ҳикматлари иймонли қилди,
Фирдавсий фалсафаси инсофли қилди.
Хаёллар ақлимни бегона қилди,
Иффатли бўлмасанг, сева олмайман.*

*Луқмони Ҳаким айтди, қилмадим,
Дўстларни ҳам назарга илмадим.
Мен ўзимнинг қадрим билмадим,
Энди ўзимни ҳам сева олмайман.*

*Мозийга қара, қайта чоғланди,
Иймонсизнинг қалби доғланди.
Иболи қизларга меҳрим уйғонди,
Сизлардан бошқасини сева олмайман.*



КЎРМАГАННИНГ КЎРГАНИ ҚУРСИН

*Бозордаги кўзлар бошқача,
Тўйлардаги юзлар бошқача,
Мақтанишлар сўзлар бошқача,
Кўрмаганнинг кўргани қурсин.*

*Мағрур кўзлар ҳам айёр кўзлар,
Борини ҳам, йўғини сўзлар.
Ерда уйи йўқ, ойни кўзлар,
Кўрмаганнинг кўргани қурсин.*

*Бирни синаб, тахт берибди,
Синаш учун нақд берибди.
Кимга тўлиқ бахт берибди,
Кўрмаганнинг кўргани қурсин.*

*Бозор бориб бозор бўлди,
Уйга қайтиб мозор бўлди.
Ҳасад тўлиб ҳазор бўлди,
Кўрмаганнинг кўргани қурсин.*

*Оч қолганда бозорга бор,
Тўйиб кетсанг мозорга бор.
Чин тўймасанг сабр ҳам бор,
Кўрмаганнинг кўргани қурсин.*

ТҮРТЛИКЛАР

*Гуллар очилсин сенинг боғингда,
Ушалсин орзуларинг ҳаёт йўлингда.
Лабингдан бўса олмасин биров,
Яширмасдан айт, ким сенга кув?*

* * *

*Гул узатдим сенга бир қучоқ,
Уялмасдан олгин сен шу чоқ.
Лолазордан тердим мен лола,
Ялинаман, олгин бир дона.*

* * *

*Достон битай бугун сен учун,
Юрак ўртанганда ўқимоқ учун.
Тўқилмасин беҳуда кўз ёш,
Сенга байтларин битади Йўлдош.*

* * *

*Кўзингда кўрсам агар ёш,
Қалбим бунга беролмас бардош.
Ҳар дона ёшингга ашғорлар битиб,
Бахтдан тахтлар тилайди Йўлдош.*

ТУШДА ИЗЛАДИМ

*Сени излайман тунда уйқусиз,
Кўзларим юмуқ, юрагим титраб.
Сахрода юрганмишман танҳо ва унсиз,
Кўлларим пайпаслар садосиз, сенсиз.*

*Қалбим ўзимни қийнади бу кун,
Бунча узоқ бўлмаса бу тун.
Сувсиз саҳронинг чети кўринмас,
Узоқдан кўринган гулдур, саробмас.*

*Фалакдан узатди менга гулдаста,
Қул чўзиб қадам босдим оҳиста.
Қувончдан уйғониб боқсам аста,
Суратинг қўлимда, юрагим хаста.*

МУҲАББАТ

*Шоҳ Бобурни йиғлатиб қўйдинг,
Ҳазрат Навоийни ёлғизлаб қўйдинг.
Ширин, Лайли, Мажнун, деб куйдинг,
Керак эмас менга бундай муҳаббат.*

*Дунё қасрига ҳам сиғмади
Шоҳ Жаҳоннинг ишқ-муҳаббати.
Кумушбиби зор-зор йиғлади,
Керак эмас менга бундай муҳаббат.*

*Машраб девонида бўзлади,
Ишқий достонида ёниб сўзлади.
Дорда ҳам ишқдан умид узмади,
Керак эмас менга бундай муҳаббат.*

*Меҳр билан боқса кўзингга,
Муштоқ бўлса ҳар бир сўзингга.
Ишқин айтган фақат ўзингга,
Керак менга шундай муҳаббат!*

ТҮРТЛИКЛАР

Агар бўлсанг бир балога мубтало,
Бирдан пайдо бўлур дардлар, алҳазар.
Минг бор уқиб, бир бор қилсанг мутолаа,
Қолмагайсан ҳеч замонда элдан беназар.

* * *

От сурганда қоқилган бўлса,
Огоҳ бўлгин, кейин давронда.
Унинг ёнида огоҳ бўлмасанг,
Сени лол қолдирар яна бўронда.

* * *

Зор бўлганда ўзинг хор қилма,
Бор бўлганда сен ҳам ор қилма.
Булмаганда бўлишиб бошинг,
Ўзингни ўзинг энди хор қилма.

СЕВИШИНГНИНГ ҶЗИ ЯРИМ БАХТ

*Ҳазрати Навоий айтмаган бекор:
«Инсонни онг айлади жудо ҳайвондин».
Меҳрсиз, иймонсиз, қанчалар беор,
Яшаб ўтмоқда умри гумондин.*

*Одамлар орасида одамлар яхши,
Ҳайвон оласини ажратмоқ яхши.
Мен дўстимни ҳақдин изладим,
Ҳақдин ўзгани билмадим яхши.*

*Меҳр кутмагин мендан, муҳаббат,
Изламадим севгининг сирин.
Бошимдан қуйиб ичсам ҳам шароб,
Ҳақни севаман қуйиб муҳаббат.*

*Севгига эришмай яшаб ўтсанг ҳам,
Маҳрум бўлсанг муҳаббатдан ҳам,
Ишқнинг оловида ёнмаганлар кам,
Яшамоқда одамга ўхшаганлар ҳам.*

*Аллоҳнинг бир бандасин севиш,
Севмаса ҳам севиши бир бахт.
Муҳаббат деб ёниб ўтмагин,
Севишингнинг ўзи ярим бахт.*

БОЛА – АЗИЗ, ОДОБИ УНДАН АЗИЗ

*Ҳали бола, улғайсин, дедим,
Яшиларга қилмадим ҳамроҳ.
Онамгамас, боламга бердим,
Йўқ, шайтонда энди не гуноҳ.*

*Полвон болам, шўх болам, дедим,
Тош отганда қўшни болага.
Барчаси ёлғон, болам ҳақ, дедим,
Энди қолди шайтон балога.*

*Ота-она, юртни ҳам билмай,
Бола солди бозорга борин.
Катта-кичикни ҳам назарга илмай,
Ҳўламади дўсту ёрини.*

*Шайтонга шерик аслида ота,
Гуноҳлари кўп халқи олдида.
Замон — ёмон, деб қарғайди она,
Болам ёмонларга шерик бўлди-да.*

*Нон, туз қадрини билмаган бола
Ота-она қадрин қаердан билсин?!
Осмонда парвоз қилган ҳар бола
Эл-юрт қадрини қаердан билсин?!*

ОТАМ АРМОНЛАРИ

*Йигитнинг қўрғони бўлгани яхши,
Отаси билан мағрур юргани яхши.
Қаср керакмас кошона нақшли,
Ёлғиз ўғил етим қолмагани яхши,
Отам ёлғизлиги мени йиғлатди.*

*Боласин ҳидига тўёлгани йўқ,
Опицлаб елкасида от бўлгани йўқ,
Тойлар етаклаб тўй қилгани йўқ,
Қотиллар бегона ёв бўлгани йўқ,
Бобом қотиллари мени йиғлатди.*

*Бола етим қолиб ким тўйиб қолди,
Кимнинг оғзидан ош-нонин олди.
Давлатин еганлар, давлатсиз қолди,
Аллоҳ ҳақ элда савлатсиз қолди,
Отам армонлари мени йиғлатди.*

*Жарлар бўлди томган, ётган макони,
Тоғлар бўлди томган жигари қони.
Ёш бошида ғам-андуҳлар мақоми,
Қайси ўрмон бўлди бобом макони,
Отам бўзлагани мени йиғлатди.*

*Отам деб йиғласа болам дегувчи,
Нидоларни бўзлаб, ахтариб ўтди.
Ўглин ўстириб сабоқ берувчи*

*Ота боласини кўрмасдан кетди,
Отам сўзлагани мени йиғлатди.*

*Қабрин топмай руҳин топгандир,
Уткинчи дунё оҳин айтгандир.
Оҳлари ҳаққа бориб етгандир,
Аллоҳ ҳақ руҳлари аршда ётгандир,
Отам руҳлари мени йиғлатди.*

ТЎРТЛИКЛАР

Ўзгани хор қилиб, оринг битса гар,
Гадолигинг яхши, бўлсанг ҳам заргар.
Бир ғариб корига ярасанг агар,
Бойсан, бойлардан бўлсанг ҳам абгор.

* * *

Ватанни ўйлама ўзлигинг билмай,
Савобни ўйлама саховат билмай.
Ўтасан вафо кўрмай, меҳр ҳам билмай,
Ўзгага ўзингни фидойи қилмай.

* * *

Ўқувинг бўлмаса, уқувинг бўлмас,
Аҳоринг бўлмаса, охиринг бўлмас.
От миниб узоқни кўрмасанг,
Икки дунёда сенга ҳеч ким зор ўлмас.

* * *

Рухларга дастурхон, неъмат керакмас,
Тирикликда иззат, ҳурмат қилсанг бас.
Қабрин обод қилиб, мағфират тилаб,
Муҳтожларга хайру эҳсон, савоб қилсанг бас.

ҲАЁ ЛИБОСИНГИЗ БЎЛСИН

*Аллоҳ ваъда берган жаннат сизники,
Жаннатда яралган санъат сизники.
Гўзалсизлар, пари, фаришта сизлар,
Ҳаё либосингиз бўлсин-да, қизлар.*

*Сизларни қизғанмаслик гуноҳ бизники,
Сизни деб жон берган мардлар сизники.
Девоналар бўлган Қайслар сизники,
Ибо юзингизда кулсин-да, қизлар.*

*Тоғларни қулатди Фарҳод сиз учун,
Қасрлар қурдирган Шоҳлар сиз учун.
Йигит мард бўлса бўлди, чирой сиз учун,
Сабр йўлдошингиз бўлсин-да, қизлар.*

*Савобдур уч марта қараш яхшига,
Таъзим қил Барчинойдан айтган бахшига.
Рўзгоринг тўлдир севги нақшига,
Иймон қалбингизда бўлсин-да, қизлар.*

*Қутлуғ бўлсин, қизлар, босган изингиз,
Ёруғ бўлсин доим ойдек юзингиз.
Йўлдош кўрмасин кўзда ёшингиз,
Бахтли бўлишга ҳақлисиз, қизлар.*

ТОЖИК ҚИЗЛАРИ

*Аллоҳ ўзи назар қилди, маликалар хазар қилди,
Бир парини хазор қилди, бир-биридан ор қилди.
Гўзал тожик қизлари, мағрур ўсган мажнунтол,
Сочларин кўриб уялган, гуллардан сўрсам ол.*

*Қизларга қараб бўянган, пари тожик қизлари,
Ҳар юзида “се” малак, хушбўй ҳидли сумалак.
Етишолмай мен ҳалак, ахтариб топдим малак,
Насли тожик қизлари, уялиб ой эгилди.*

*Қуёш ҳасаддан ёнди, юлдуз қадалиб қолди,
Баҳор ҳам йиғлаб олди, кўриб тожик қизларин.
Тили эмас, дилини кўзларидан билиб олдим,
Сўрамасдан қалбини, қалбимга боғлаб олдим.*

Кимгадир алам солдим, севиб тожик қизларин.

ҚОЗОҚ ҚИЗЛАРИ

*Қардош қозоқ қизлари,
Бодом қовоқ кўзлари,
Ширмой нондек юзлари,
Менга ёқар нозлари.*

*Юрагим олдингизлар,
Не кўйга солдингизлар,
Бошқага қаролмайман,
Сизларга айтолмайман.*

*Дўмбира чалса қизлари
Нағмалари бошқача.
Майда қадам излари,
Бирам ширин сўзлари.*

*Оққушларни ўйнатиб,
Ўлан айтишин кўринг.
Юрагимни ўйнатиб,
Кўшиқ айтишин кўринг.*

*Лўппи-лўппи юзлари,
Қозоқ оға қизлари.
Йўлдош нени кўзлади,
Манзилларин излади.*

ЯРИМ БАХТИНГ ТЎЛДИРГИМ КЕЛДИ

*Ярим бахтинг тўлдиргим келди,
Ғамгин юзинг кулдиргим келди.
Бўлмагани бўлдиргим келди,
Дардим кимга айтайин энди.*

*Қорли кунда ёзни истадинг,
Саратонда баҳор истадинг.
Шудир балки менинг ҳаётим,
Мен саҳродан гуллар истадим.*

*Бўлмаганга бўлишма деган,
Наҳот умидимни иймонинг еган.
Бошимга не савдолар солган,
Яшашдан қай умидим қолди.*

*Кемтик бахтни тўлдириб бўлмас,
Тоғжу тахтинг эгаси бўлмас.
Бахтим кулар, барчаси ўлмас,
Ярим бахтинг мен билан тўлмас.*

*Ёз ёмғири ёғиб ўтиб кетади,
Гуллар хазон бўлиб қариб кетади.
Ёлғизликдан ким манзилга етади,
Икки кўзинг ҳар бири ўзимга етади.*

* * *

Қимиз ичган йигитлар
Бўза ичса бўзлайди.
Қимрон ичган йигитлар
Қатордан қиз излайди,
Қимиз ичсин йигитлар.

Қази еган йигитлар
Тоғдан ғорни излайди.
Този еган йигитлар
Қайдан орин излайди,
Қимрон ичсин йигитлар.

Эр йигитга эл керак,
Элнинг орин излайди.
Йўлдош билар, от керак,
Манзилини кўзлайди,
Бўза ичсин йигитлар.

Қанот бўлган йигитга
От минса қиз сўрайди.
Вафоли бўлсин ёри,
Ҳар қадам “изн” сўрайди,
Бўса ичсин йигитлар.

Қази еса йигитлар
Илиги тўлиб пай бўлар.
Осмонда бўлса булутлар,
Кўйнида сулув ой бўлар,
Роса тўлсин йигитлар.



* * *

*Кўҳна чинор, танангда не армонларинг бор,
Замондош сен билан бу кўҳна Дунё.
Кувончу ғамларга шерик, гувоҳсан, чинор,
Шохларинг синдирдиму ташвишли Дунё?*

*Соя излаганга паноҳ бўлган қўрғоним,
Қуриган шохингдан қайнадиму қумғоним.
Мусофиру дарвешга бўлдинг шоҳона Сарой,
Мозийни сендан бошқа кимдан ҳам сўрай.*

*Булоғингдан юзин ювди қанча ҳур пари,
Қайси алплар дам олганди ўйнаб кўпқари.
Қанча карвон ором олди манзили йироқ,
Қанча ғам кўрдинг, ҳам дарду фироқ.*

*Сояларинг кимлар учун бўлганми тузоқ,
Насиб қилмаган сендан бошқача кўрмоқ.
Қайси гуноҳинг учун синганди шохинг,
Кўҳна чинор, айтгин энди фарёдинг, оҳинг.*

*Шохларинг синдиришди, сен ўсавердинг,
Ғамдан ёрилди тананг, сен ўсавердинг.
Ҳур замонлар келди, ўсавер, чинор,
Бойсун тоғларида кўкарган минор.*

ЎЗИНГ АСРА

*Умринг ўтаверар, бирор мақсад йўқ,
Уйқуларинг тинч, эрта кунинг йўқ.
Икки нафсинг тий, сенга бало йўқ,
Дунёни сув босса сенга фарқи йўқ,
Гофиллардан асрагин, Аллоҳ!*

*Аллоҳ сабр берди, имкон биттамас,
Шукр қилмасанг, нафсинг ҳам тўймас.
Бахтдан адашган битта сен эмас,
Ҳалол топмаганинг ҳаром бошқамас,
Баднафслардан асрагин, Аллоҳ!*

*Сабр қилмасанг, мағфират ҳам йўқ,
Меҳр билмасанг, муҳаббат ҳам йўқ.
Бугунни билмагани эртаси ҳам йўқ,
Ҳақ йўлни изла, эрта-кечи йўқ,
Бесабрдан асрагин, Аллоҳ!*

*Ризқинг бутун бўлар, сабрли бўлсанг,
Ҳамду сано айтиб, меҳрида бўлсанг.
Садоқат ҳам бор, севги сеҳрини билсанг,
Кам еб, кам десанг, кам қилмас, билсанг,
Ношукрлардан асрагин, Аллоҳ!*

*Сабр билан топган ризқинг ош бўлсин,
Меҳр билан топган ишқинг тош бўлсин.
Умринг ярми тун бўлса, ярми кун бўлсин,
Элига бўлмаса ҳам, уйга бош бўлсин,
Инсоф бергин банданга, Аллоҳ,*

Инсофсизлардан асрагин, Аллоҳ!

СЕН ЁҒДУСАН

*Сен боғимсан меваларимнинг,
Сен гулимсан гулзорларимнинг,
Сен зоримсан озорларимнинг,
Сен ёғдусан ғуборларимнинг.*

*Қалбингда бўлган ҳар битта озор
Қиёматгача қолмасин дейман.
Ҳақ марҳаматига бўлиб интизор,
Эрта хазон бўлмайин дейман.*

*Бир гуноҳни қилсам мен такрор,
Қабоҳатдир бил, қиёматгача.
Бир гуноҳга минг тавба қилсам,
Марҳаматдир бул, қиёматгача.*

*Такрор айтса тавба ҳам гуноҳ,
Аллоҳ билгувчи, ҳақ ўзи гувоҳ.
Боғимни хазон қилмагин, э воҳ,
Гуноҳ қилиб бўлмайин гумроҳ.*

*Гадо бўлсанг ҳам кўнглинг доғ қилма,
Шоҳ бўлсанг ўзгалар кўнглин доғ қилма.
Ғофил бўлма, боғ ярат, Йўлдош,
Гуноҳ қилиб кўнглинг доғ қилма.*

УМИД ЮЛДУЗИ

*Ойдан умиди йўқолганда тун,
Күёшни ҳам соғинмас ҳар кун.
Кун кўрмаган бир бағри бутун,
Юлдуздан умидин узмади ҳар тун.*

*Тунлар ғамидан койиган юлдуз
Кундуз қуёшдан ор қилиб қолди.
Еруғлигин олиб аламни кундуз
Тунлар бошига маломат солди.*

*Қалбида бир шубла қолмаган,
Тун кунларнинг зарбида қолди.
Ою қуёш ҳам овутолмаган,
Юлдузлардан умиди қолди.*

*Юлдуз санаб ўтган тунлари,
Күёш бўлиб юлдуз порлади.
Олов эмас, бир чўғ бўлса бас,
Ором бермай тунлар хўрларди.*

*Умид юлдузларим, порлагин энди,
Доруломон кунларинг келди.
Сабрсизлик қилмагин энди,
Қалбинг ёруғ тунларинг келди.*

* * *

Дўстдан ўтсанг хафа бўлса,
Қилган ишинг хато бўлса.
Дигар сенга жигар бўлса,
Ҳақдин ўзга дўст топмадим.

Оху зоринг ҳаққа етса,
Хурликларинг сендан кетса.
Ҳожатингга раҳмат айтса,
Дўстим хафа, мен айтмадим.

Эл оралаб сўзинг ўтса,
Битмаганинг битиб қолса.
Дўстинг сендан ҳасад қилса,
Дўстим қайтди, мен қайтмадим.

Дўстим мендан зиёд бўлсин,
Минганлари ғирот бўлсин.
Қурганлари работ бўлсин,
Деган дўстни мен топмадим.

Дўст бўлсанг, бўл қиёматлик,
Бир умрлик, зиёратлик.
Иймонлик бўл, диёнатлик,
«Расул» айтди, мен айтмадим.

УКАЖОНЛАР

*Жигар эдик, укажон,
Келин келган кунгача.
Энди ўзга «акажон»,
Мард эдинг-ку тўйгача.*

*Онанг бўлди бегона,
Қариндошинг ягона.
Дард келдимү бедаво,
Ўйлаб кўргин сен яна.*

*Омон бўлсин бошларинг,
Бизсиз еган ошларинг.
Тўкилмасин ёшларинг,
Муборакдур хешларинг.*

*Донишмандлар зикр қилган,
Ярим нонга шукр қилган.
Кеч бўлмасдан фикр қилгин,
Ким сени ношукр қилган.*

* * *

*Хур диёримизда борлиғимиз ҳақ,
Кўп ноҳақликлар кўрганамиз ҳақ.
Тарихимиз ёлғон, айтишган ноҳақ,
Болаларимиз ўргангани ҳақ.*

*Кўзимизни боғлаб етаклашибди,
Теракдек ўссак, бутоқлашибди.
Фанимлар биз билан ўртоқлашибди,
Оқни қора, қорани оқлашибди.*

*Ўрганиб қолган эдик «ура-ура»га,
Ризқимиз йиғолмадик битта ўрага.
Бошимизни эгдик қанча тўрага,
Байроғимиз ўтказ уйнинг тўрига.*

*Мен кимлигимни боламдан билдим,
Элимнинг улуғлигини эл аро билдим.
Истиқлол бўлмаса, ёлғончи дунёдан
Қадрим билмай, сўқир ўтишим билдим.*

*Кўзим очиқ кўр кетмай, болам,
Билмаганим билдиргин, болам.
Боболаринг кўрмай кетгани алам,
Истиқболимиз абадий, болам.*

* * *

Тонгни ёлғиз кутиб олади,
Юлдуз санаб тунни ўтади.
Кунлар маломатга кетади,
Ёстиқ билан сўзлашган аёл!

Дард қалбини кемирса ҳам,
Ўз хатосин кечирмас ҳар тун.
Болалари тушунар бир кун,
Ёлғиз Аллоҳдан умидли аёл!

Энди дўсту меҳрибон ҳам кўп,
Ўткинчи ваъдалар ҳам кўп.
Ўз қадрига йиғлар энди хўп,
Тақдирига тан берган аёл!

Шундан бошқа йўқмиди синов,
Дўстинг сенга бўлганида ёв.
Сенинг ёринг бўлганида ов,
Аллоҳдан сабр тилаган аёл!

Ёстиғингга дардингни ёздинг,
Дўсту душманингга дастурхон ёздинг.
Бугун тутдек тўкилиб, оздинг,
Ҳақнинг ўзи асраган аёл!

Ўтмишингга хаёл кетдиму,
Оҳинг бориб ҳаққа етдиму,
Фарзандларинг бўйга етдиму,
Уларда бахтингни кўргин-да, АЁЛ!

САБРСИЗ АЁЛ

Кўз очиб кўрганинг қадамини ўп,
Топмаса ҳам давлатингни кўп.
Баракасин берар Аллоҳ,
Қаноат қилсанг топганга, аёл!

Ҳавас қилма ўзгалар бахтин,
Меҳр қўйма бўлса гар тахтинг.
Могу дунё бузади аҳдинг,
Сабрли бўл, сабрсиз аёл!

Не-не маликалар дунёдан ўтди,
Қасрлари қолди, ўзлари кетди.
Етти иқлимга довуғи етди,
Садоқатинг асрагин, аёл!

Ибо, ҳаё — бу тожу тахтинг,
Ор-номусинг — зар либосинг.
Бахтинг асли ёрингга аҳдинг,
Қабоҳатга йўл олма, аёл!

Ҳавас етаклайди ҳасадга томон,
Бир кунинг яхши, бир кунинг ёмон.
Ёринг билан қолишинг гумон,
Ёлғиз бўлиб қолмагин, аёл!

Зар-олмосинг борида хуш бор кўп бўлди,
Гузал ҳуснинг борида хушдор кўп бўлди.
Бугун сенга ёлғиз ёстиқ дўст бўлди,
Сенга ўхшамасин бошқа бир аёл!

ТҮРТЛИКЛАР

*Тахтинг борида нақдни ўйладинг,
На бир ночор йўқни ўйладинг.
Ўзингга тенг билиб, тўқни ўйладинг,
Йиқилган кунинг ҳақни ўйладинг!*

* * *

*Гул узатсам гуллардан гўзал,
Ойда ҳам доғ бор, сен ундан гўзал.
Арилар лабингдан олганмикан бол,
Шунчалар кулиб боққанми иқбол.*

* * *

*Ёлғон ваъда, жоним, бермайман,
Ҳазон қилиб гул ҳам бермайман.
Меҳримни кўрсанг, қалбим сеники,
Қадрим билсанг, борим сеники.*

* * *

*Халқ бир уммон — дарёлари кўп,
Оқ сувию кўк суви, кўлмаклари кўп.
Сувга тупурган — азалий гуноҳ,
Салом бериб ирмоқларин ўп.*

* * *

*Инсон боғ бўлса, боғбон ҳам ўзи,
Фарзанди гул бўлса, гулзор ҳам ўзи.
Аллоҳдан умидвор боқсалар кўзи,
Меҳр-мурувват қилган ҳам ўзи.*



* * *

*Дарё бўлиб оққинг келдиму,
Уммонларга кетгинг келдиму.
Балиқларга дардингни айтиб,
Муродингга етгинг келдиму.*

*Мурғаккина сенинг қалбингга,
Етмадиму ҳеч ким қадрингга.
Дарё ўчирадиган олов ким олди,
Уволингга энди ким қолди.*

*Дардингга бировни шерик қилмадинг,
Айтиб бошқалар бағрин тилмадинг.
Ёшгина бошингга шунчалар алам,
Шафқатсиз солганлар бормикан, болам.*

*Билмам, кимнинг кўнглин ғашлаган,
Сувга дардларин айтиб ташлаган.
Қай иймонсиз бу йўлларга бошлаган,
Қон йиғлатиб кўзларини ёшлаган.*

*Дарёларга сен ғамларинг айтдингму,
Бўйга етмай бу дунёдан қайтдингму.
Ота-она сени йўқлов байтини
Минг бор титраб мазорингда айтдимму?!*

ҲАР ТУНИНГНИ ҚАДР ҚИЛГИН

*Борлигида бутун нонлар увоқ бўлди,
Давлат келса бу сен учун озроқ бўлди,
Хайр-эхсон, савоб сендан узоқ бўлди,
Барчасига ҲАҚнинг ўзи гувоҳ бўлди,
Ҳикмат ўқиб барчасига фикрат қилгин.*

*Кийган тўнинг эртасига тор келди,
Барча билан суҳбат қуриш ор келди,
Ўнта бору битта интизор келди,
Сен унутган баъзан эътибор келди,
Дўст йўлида айтганларин зикр қилгин.*

*Чориғингни унутмагин бой бўлсанг ҳам,
Ҳасад қилдинг куни келса ўзингдан ҳам,
Молу дунё нафсинг учун бўлди малҳам,
Давлат келса оқиб келсин томчилар ҳам,
Аллоҳ берган насибангга шуқр қилгин.*

*Эътиқодинг, диёнатинг, молу дунё —
Тўртов ора юролмайсан йўқса дунё,
Бир кам дунё — барчаси ҳам бўлмас рўё,
Икки дунёнинг обод бўлур олсанг зиё,
Ҳақ йўлида илм олиб сабр қилгин.*

*Давру даврон сурганни ҳам олди замон,
Битта гадо қолмади-ку бўлиб ёмон,
У дунёдан бойман деган келмас забон,
Ким қаердан жой олади — ҳаққа аён,
Фофил бўлмай ҳар тунингни қадр қилгин!!!*



ТҮРТЛИК

*Дарахтга тош отсанг меваси кетар,
Меваси бўлмаса япроғи, сояси кетар.
Осмонга тош отсанг бошинг, ё қошинг кетар,
Олма тушишин кутсанг, ёшинг, ҳам ошинг кетар.*

ЧИРОЙГА УЧМА

*Кимнинг бахти очилиб кетди,
Ким мурод-мақсадига етди.
Барчасин ташлаб оламдан ўтди,
Гўзалларга учган сендек нодонлар.*

*Сен осмонда эдинг, одамлар ерда,
Сен қайдаю бизлар қаерда.
Сув ичмадинг биз билан бирга,
Ойларга учган сендек нодонлар.*

*Гўзаллардан сулув изладинг,
Ўзимни сен деб, сени сизладим.
Қалбимда борин-йўғин сўзладим,
Осмонларда учдинг, сезмадинг.*

*Чиройли қошларига учма,
Достон қилиб дардингни очма.
Бахтингдан кечу ўзингдан кечма,
Ўзингдан кечсанг ҳам иймондан кечма.*

*Ўз чиройинг душман ўзингга,
Яхши-ёмон боқар ўзингга.
Бир кун келиб қора кўзинг ҳам
Ёқмай қолар сенинг ўзингга.*

БАҲОР КЕЛДИ

*Қорлар эриб, баҳор келди,
Қушлар сайрар саҳар келди.
Бойчечаклар бойланиб,
Наврӯз бўлиб Наврӯз келди.*

*Офтоб чиқди елкамизга,
Порлар юлдуз йўлимизда.
Меҳмон бўлинг ўлкамизга,
Наврӯз кулиб, Наврӯз келди.*

*Ҳар кунимиз Наврӯз бўлсин,
Уйларимиз нурга тўлсин.
Ҳар тунимиз Қадр бўлсин,
Қадрин билиб Наврӯз келди.*

*Тун ҳам, кун ҳам бирга бўлди,
Қизларимиз ойдек тўлди.
Аллоҳ, нуринг бизга кулди,
Наврӯз, бугун Наврӯз келди.*

* * *

*Покиза қизларни кўрсам ҳар сафар,
Кафтимда кўтариб юрсам мен дейман.
Иболи кўзларига боқиб тонг саҳар,
Номига номалар битайин дейман.*

* * *

*Кўзларингда кўрсам дона ёш,
Қалбим унга беролмас бардош.
Юрак нидоларим қоғозга битиб,
Сиз учун байтларин битади Йўлдош.*

* * *

*Гуллар берай десам, гуллардан гўзал,
Ут бўлиб ёнмоқда юрагим, берай.
Зор эмасман, керакмас десанг,
Айт, бўлмаса не, жонимни берай,
Лол бўлиб туравер, сенсиз ҳам гўзал.*

СОЧЛАРИ УЗУН ҚИЗНИ СЕВАМАН

*Аслида қизларнинг ёмонлари йўқ,
Ҳар бир қизда биттадан юрак.
Ҳали қизларни севолганим йўқ,
Менинг севгим бошқача, бўлак,
Мен иболи қизни севаман.*

*Қошларин терганлар керакмас,
Қошлар ўрнида соялари бор.
Кўшимча киприк изи керакмас,
Қотган қаламнинг поялари бор,
Мен ҳаёли қизни севаман.*

*Бўяган юзларинг керакмас,
Чиройли сўзларинг бўлса бас.
Чиройли сўзинг ҳам керакмас,
Қалбларинг чиройли бўлса бас,
Юраги пок қизни севаман.*

*Елкангда парилар сочингни силаб,
Ўйнарди, кесилди. Энди йўқ!
Кесилган сочингни шайтонлар улаб,
Сени етаклайди, кўнгиллари тўқ,
Сочлари узун қизни севаман.*

СИНГЛИНГИЗДАН ХАБАР ОЛИНГ

*Ота борлиги тоғ бўлар экан,
Она борлиги боғ бўлар экан.
Улар бўлмаса доғ бўлар экан,
Акаларга интизор қизлар.*

*Ўз уйига меҳмон бўлган,
Ўзга уйда мезбон бўлган.
Келмасангиз гулдай сўлган,
Акаларни кутганда қизлар.*

*Сизсиз ҳам кунлари ўтар,
Отмай қолмас, тонглар отар.
Сизни кутиб кунлари ботар,
Акаларга интизор қизлар.*

*Бирон ками йўқдир уйида,
Дўсту ёрлар бўлар тўйида,
Ғамгин бўлиб қолар уйида,
Акалари келмаса қизлар.*

*Киши фарзанди аслида қизлар,
Барибир интизор сизларга кўзлар.
Келмаса ҳам бир бор уйига,
Акаларга омонлик тилайди қизлар!*

МАЖНУНТОЛ

*Келинлар таъзимни ўрганган сендан,
Бошинг эгиклиги камчилик эмас.
Манманлик ва кибр узоқдур сендан,
Учрашувга келишар ёнингга бирпас.*

*Севишганлар сирли сеҳрини билиб,
Шохлари эгилиб қолгайдир толнинг.
Бир-биридан қаттиқ ор қилиб,
Уялиб қолишар биринчи бўсадан.*

*Биринчи учрашувга келган қизларнинг
Эгилиб туриши, нозлари сенга ўтдиму?
Ерни чизиб боққан кўзларнинг
Гўзал нигоҳлари шохинг эгиб кетдиму?*

*Кокилини қирқ ўриб тараб,
Етмаганига сендан қўшдиму?
Ой тўлганда сочларни ўраб,
Икки бошни бирга қўшдингму?*

*Эгилмасин гуноҳдан бошинг,
Бахтли бўлсин бу икки ёшинг.
Чимирилмасин чиройли қошинг,
Порлайверсин кўкда қуёшинг.*

*Бош эгаман мен ҳам, мажнунтол,
Барчагамас, ким сўрса аҳвол.
Мағрурликдан йиқилсанг беҳол,
Сени кутар маъюс мажнунтол.*

ЧИМИЛДИҚДА ЭГИЛДИ БОШ

Тўйга келди қарию ёш
Дастурхонда наҳори ош.
Оғалари бўлганди бош,
Чимилдиқда эгилди бош.

Уялишди, кўзларда ёш,
Она эди ҳам кўзи ёш.
Томоғига тиқилди тош,
Чимилдиқда эгилди бош.

Ота ўзи қолди бир бош,
Ҳосиллари бўлганди лош.
Кетишдилар еёлмай ош,
Чимилдиқда эгилди бош.

Мен ҳам сендек бир кўнгли бўш,
Маслаҳат бер, энди не хуш.
Кўз ўйилди, бўялмай қош,
Чимилдиқда эгилди бош.

Аллоҳ берсин сенга бардош,
Қизинг асра бўлса ҳам ёш.
Надоматда тўкма кўз ёш,
Чимилдиқда эгилди бош.

ЭҲТИЁТ БЎЛ АЁЛЛАРГА

*Сиринг айтсанг аёлингга,
Эҳтиёт бўл хаёлингга.
Қолиб кетма заволингга,
Бош қолмасин уволингга.*

*Момом айтган аёл бошқа,
Аёл бошқа, хаёл бошқа.
Тушуради пашиша ошга,
Тушиб қолсанг бағритошга.*

*Ота-онанг ов бўлади,
Қариндошлар ёв бўлади.
Шунда унинг бағри тўлади,
Дўстинг душман, ғаним кулади.*

*Сени қора ер қилади,
Ҳамма сендан ор қилади.
Бир кун сени хор қилади,
Сиринг айтсанг аёлингга.*

*Аёлларнинг аёли бор,
Фариштадек хаёли бор.
Ҳам ибоси, ҳаёси бор,
Жонинг берсанг бу аёлга.*

КАПАЛАК

*Бир кунинг бор умринг,
Туғилгандан безандинг.
Кўрмадинг ҳам шудринг,
Нозиккина капалак.*

*Гуллар сени излаб қолди,
Қизим ҳам йиғлаб олди.
Силамоқчиман уни,
Деб қўлин тишлаб олди.*

*Сен ҳам мендек гулларга
Ошиқлигинг билмадим.
Борасанми чўлларга,
Сен демагин, билмадим.*

*Қанотларинг силасам,
Кўлларимни зар қилдинг.
Энди қачон келасан,
Топганимда зор қилдинг.*

*Гуллар мендан сўраса,
Мен дейинму капалак.
Қизлар мендан сўраса,
Қани дейман капалак.*

СЕВГИНИ ХОР ҚИЛМА!

*Севгингни хор қил, майли,
Увол қилиб севгини эмас.
Бўлмасанг ҳам Ширину Лайли,
Сен ҳаётдан бўлмагин сармаст.*

*Бизгача ва биздан кейин ҳам,
Дилдан севган бўлмадилар кам.
Севги бор, севги муқаддас,
Севолмасанг бас қил энди, бас.*

*Ўзин севмаган ўзгани севмас,
Ўйламайди ҳаттоки бир нас.
Уммонда йўқолгандай хас,
Кўнгилхушлик ўтади бир нас.*

*Севгисиз яралмаган аслида дунё,
Чумоли ҳам бўлмасди гўё.
Ўйлаганинг бўлмайди рўё,
Айтмагин сен, бевафо дуне.*

*Сен ўзингни сева олсанг бас,
Ундан ўтиб ҳақни севсанг бас.
Ҳақнинг ўзи қилмайди хор,
Агар сенда бўлса ғурур, ор.*

«НАНАЙГА БОР»

*Тоғдан ошиб бордим Нанай,
Мақтаган қизларин кўрай.
Жаннатнинг бир бўлаги бор,
Бормаганлар зор, интизор.*

*Қизларига қаролмайсан,
Тоғдан ошиб юролмайсан.
Қизларининг нозлари кўп,
Юрагингни беролмайсан.*

*Қизлар кулса, қайтиб кулар
Кўшилишиб даъралари.
Нигоҳидан бағринг тўлар,
Пари ҳатто қарилари.*

*Лабларига қўниб кетган,
Тоғнинг айёр арилари.
Қизлари кўп бўйи етган,
Нанайнинг ҳур парилари.*

*Ғам уларни четлаб ўтган,
Кулгулари кўкка етган.
Умид қилиб йўлга чиқиб,
Кўплар уйига қайтиб кетган.*

*Кўролмасдан ҳур қизларни,
Ярим йўлда лаби қотган.
Тополмасдан изларини,
Кўп йигитлар уйдан кетган.*

ҚАЛДИРҒОЧ

Баҳор келиб айвонимга
Кўчиб келди қалдирғоч.
Жой кўрсатай меҳмонимга,
Пешайвондан бир қулоч.

Уй қуришди болахона,
Фишдан эмас, синчданов.
Менинг хонам тағхона,
Кўшни бўлдик, ҳамхона.

Хўроз моки бир бўлиб,
Битиришди уйларин.
Тез кунларда уй тўлиб,
Қилди бола тўйларин.

Бешик тўйга қизим
Кўшнилари чорлабди.
Тўйга борибман мен ҳам,
Қуруқ келса қўймабди.

Яна келгин, қалдирғоч,
Шу айвоним сеники.
Торлик қилса бу ёғоч,
Қалбим тўри сеники.

ҚАЛБИНГ КУМУШ БЎЛСИН

*Олтин, кумуш, барча зар,
Дуру гавҳар, маржонлар,
Биров топса, биров зор,
Сизлар учун, аёллар.*

*Дунё-да, дунё қизиқ,
Шоҳу гадо баробар.
Тополмасанг зар тузук,
Ҳаётинг бўлмас қизиқ.*

*Оғзи қийшиқ бўлса ҳам,
Бойнинг қизи гапирсин.
Пишган оши бўлар хом,
Йўқликнинг куни қурсин.*

*Олтин билан одам бўлса,
Иймон ўзи бўлмасди.
Иймони олтин бўлса,
Инсофсизлик бўлмасди.*

*Қалбинг бир кумуш бўлса,
Сўзларинг дуру гавҳар.
Зимистони қиш бўлса,
Юзингда доим баҳор.*

* * *

*Ўтди яхши замонлар, дер гофиллар,
Замона ёмон бўлди, дер ғанимлар.*

*Яхши ният — ярим давлат, дер софдиллар,
Ҳали даврон сурар не-не пок диллар.*

*Бу замонни излаганлар руҳлари шод,
Ўз элингда қул бўлганинг эсла шояд.*

*Нафсини деб ўйлаганлар, калтабинлар,
Қай замонлар қандай ўтди, Аллоҳ билар.*

*Ёмон деманг, нодонларга инсоф берсин,
Аҳмоқ деманг, лодонларга ақл кирсин.*

*Ер юзида зиёлимас барча одам,
Гиёҳ ўсмас ҳамма жойда, кезгин олам.*

*Минг қўшчига ҳар замонда бошчи бўлган,
Бир қушчига минг бош бўлса кафан тўлган.*

*Ношукрлар бор замонда, ошни ошлаб,
Тўйдирганни ўлдиришган бошни тошлаб.*

*Яхши бўлсанг ёмонликни ўйлама ҳеч,
Йўлдош, сен ҳам кўзингни оч бўлмасдан кеч.*

* * *

Ҳаётдан умидинг қолса,
Боринггу йўғингни олса,
Бошингга не балолар солса,
Бир эслагин гўдак исини.

Дўстинг бугун ёвга айланса,
Оёқ-қўлинг бирга бойланса,
Сен йўқотсанг ҳаёт изини,
Қайта ҳидла гўдак исини.

Ҳориб келсанг ҳар кун юмушдан,
Бошинг чиқмай қолса ташвишдан.
Сенга куч берар кетсанг ҳам ҳушдан,
Бир ҳидлагин гўдак исини.

Гуллар келтиринг гўдакли уйга,
Хушбўй анбарлар сепинг бўйига.
Ҳаммаси бир ён бўлади уйда,
Тенг келмайди гўдак исига.

Гўдакнинг иси — оила қувончи,
Авлод давоми — юрт таянчи.
Аллоҳ берсин ўғилу қиз,
Ҳаёт қизиғи гўдакнинг иси.

* * *

Тонгни кутаётган феруза юлдуз,
У кўкда, мен ердаман ёлғиз.
Мен ерда, юлдуз кўкда топмади,
Мен тунда адашдим, у эса кундуз.

Тунда ҳамроҳ бўлди менга ой,
Юлдузни йўқотди қуёш, йўқ чирой.
У кундузга, мен тунга ёқмадим,
Ярми кулиб, ярми куйиб боқди ой.

Қалбимдаги юлдуз билан сўзлашиб,
Кўкда ойнинг ярми қора тун бўлди.
Бир-бирига дардин айтиб бўзлашиб,
Икки кўзим бир-бирига хун бўлди.

Юлдузларни хўрламагин, жон қуёш,
Тунда иккимиз ҳамон сўққабош.
Булутлар ҳам юлдуз учун тўкди ёш,
Кўз ёшим йўқ, Аллоҳ берсин сабр-бардош.

* * *

*Молини ўғирла, майли, зарларини олиб,
Олиб кетгин борини қўнжингга солиб.
Сен аҳдингдан қайтмагин тониб,
Ўғирлаб кетма биров бахтини.*

*Ҳазил қилгин, майли, унинг ўзига,
Гап келса қайтмагин айтган сўзига.
Ёлғон меҳр билан боқиб кўзига,
Биров бахтини ўғирлаб кетма.*

*Ўзгалар аҳдини бузма ўзингни ўйлаб,
Бегонага кўзинг сузма ёр танлаб.
Ўз бахтингни топмадинг, қушдек донлаб,
Биров бахтини ўғирлаб кетма.*

*Сохта кўз ёш билан кўнглини олма,
Ёлғон меҳрингни қўйнига солма.
Не-не балоларни бошига солиб,
Биров бахтини ўғирлаб кетма.*

*Бахтдан адашса, бўлмайлик ҳамроҳ,
Ўзинг аҳдинг бузиб, бўлмагин гумроҳ.
Қалбини вайрон қилиб яшама, э-воҳ,
Бировнинг қалбини қилмагин сиёҳ.*

ЮРТИМ ҚИЗЛАРИ

*Бу дунё қувончлари,
Узингиз сиз, элим қизлари.
Тўқилмасин кўзда ёшлари,
Кулиб юрсин юртим қизлари.*

*Бешигида дунё тебратган,
Эшигидан бошлаб безатган.
Меҳмонини кулиб кузатган,
Фариштали ҳур келинлари.*

*Омонатдек сақлар қизини,
Номаҳрамдан асрар кўзини.
Фидо қилар ҳатто ўзини,
Қизлар учун бизнинг оналар.*

*Бошин силаб неварасини,
Кутиб яшар чеварасини.
Кўрмасам дер оворасини,
Дуо қилар момоларимиз.*

*Кўшни қиз ҳам бизнинг қизимиз,
Асрайлик-да, у ҳам кўзимиз.
Танлашамиз куёв ўзимиз,
Жигардан ҳам яқин қўшнимиз,
Ана шундай бизнинг элимиз.*

ТОНГ

*Эзгу ният ҳам қувонч билан,
Ҳар бир тонгни кутмаган ким бор.
Ҳаққа айтиб ҳамду сано,
Тонгга салом бермаган ким бор.*

*Расул айтган: — Тонгда турмаган,
Омонликни Ҳақдан сўрмаган,
Ғафлат босиб саҳар кўрмаган,
Ҳақ назарига олмаган ким бор.*

*Ҳатто қушлар сабоқ берган,
Туни билан саёқ юрган.
Шайтон ошдан товоқ берган,
Тонгда ўзин унутган ким бор.*

*Таҳоратсиз боқма ўзингга,
Ёмон ниятинг қолдир изингга.
Ҳақдан мағфират тилаб ўзига,
Тонгни саҳарда кутганга кун бор.*

*Саҳар турмасанг ҳам, кунлар ўтади,
Бугун насибанг сендан кетади.
Чумоли ҳам ризқин териб ўтади,
Унутмагин, ҳар кун учун бир хун бор.*

ҒҰР ЙИГИТЛАР

*Мардлигини кўз-кўз қилар,
Ваъдалари бир сўз бўлар.
Сулувларнинг сочин силар,
Тушларида ғўр йигитлар.*

*Бир-бирига шўхлик қилар,
Оч бўлса ҳам тўқдек бўлар.
Қизлар ўтса бир гап қилар,
Бир-биридан шўх йигитлар.*

*Мўйловлари сабза урган,
Юлдуз санаб кеч туришган.
Қизлар кўрса сочин ўрган,
Қаторлашиб қараб турган.*

*Қизлар боқса, соч тарашар,
Имо қилиб, тик қарашар.
Дўриллаган сўз ярашар,
Бир қизга ўнта йигит талашар.*

*Бир йигитга битта қизнинг ўзи бас,
Қизлар ўзи ноз қилишиб тинч қўймас.
Йигитларни қийнаманглар, қизлар, бас,
Ғўр йигитни қўлга олиш ҳеч гапмас.*

ОРЛИ ҚИЗ

*Шўх-шодон бир қиз боламан,
Қирқ нози бор Шаҳнозаман.
Худо хоҳласа, яхши келин бўламан,
Сизлар учун дostonлар ҳам ёзаман.*

*Шўх-шодон нозларимни қўяман,
Меҳр билан қадам қўйиб остонага.
Шу юрт учун ўз жонимни бераман,
Халқим учун бир фидойи бўламан.*

*Керак бўлса мард йигитлар лол қолсин,
Оғзи очилиб, тилларида бол қолсин.
Шаҳноза қиз, пок қиз, деган ном қолсин,
Орзулари бир дунё қиз бўламан.*

*Йигитлари орли бўлсин элимнинг,
Ҳар бир қизи ёрли бўлсин элимнинг.
Кийганлари зарли бўлсин элимнинг,
Шаҳноза ҳам бори бўлсин элимнинг.*

ЗУЛФИНГ ҚАНИ, ЗУЛФИНГ НОЛАСИ

*Юзингни яшириб кокилинг,
Хуснингга зеб берарди зулфинг.
Қирқта ўрилиб сочларинг,
Жамолингни очарди зулфинг.*

*Кокилларинг музлатиб қўйиб,
Кийдиришди юзингга ниқоб.
Кесилгандан қолгани куйиб,
Куймаганни қилдилар хароб.*

*Жамалакнинг суратин кўриб,
Сочларинг ўзин қурбон қилдилар.
Ўз рангини бошқача қилиб,
Ҳофизни безабон қилдилар.*

*Қирқ кокилга ашъорлар битиб,
Зулфинг соясига дoston ёзарди.
Қай манзилга етдинг, соч кесиб,
Ҳар толасига шеърлар ёзарди.*

*Соч ўрнида елкага нигоҳ
Қарамасдан ўтиб бўлмайди.
Зулфинг ўрнида нимадир, э воҳ,
Қарашингдан кўнглим тўлмайди.*

ОТ МИНГАН ЙИГИТЛАР

*От минган йигитнинг
Юраги бод бўлмайди.
Фурури бор йигитнинг
Ватани ёт бўлмайди.*

*Жийрон минган йигитлар
Манзилга тез етади.
Бахтдан тинган йигитлар
Даврон суриб ўтади.*

*Тўриқ минган йигитлар
Эл корига ярайди.
Бўз от минган йигитлар
Ўз манзилига қарайди.*

*Ғирот минган йигитлар
Чамбилдан ор излайди.
Кўнгли синган йигитлар
Ёрин излаб бўзлайди.*

*Отдан тушган йигитлар
Зоддан тушмасин элда.
Зоддан тушган йигитлар
Тилдан тушмасин элда.*

САЛОМ БЕРГИН

*Ойга боқма от минганда,
Нақдинг бўлиб сен тинганда.
Кулиб ўтма дўст синганда,
От минганлар салом берсин.*

*Расулulloҳ тайин қилди,
Ҳақнинг ўзи изн берди.
Қояни ҳам майин қилди,
Тоғ бўлсанг ҳам салом бергин.*

*Мева берсанг миннат қилма,
Миннат қилиб бағрин тилма.
Мевасизга ҳазар қилма,
Боғ бўлсанг ҳам салом бергин.*

*Бир хил қара бору йўққа,
Эргашмагин фақат тўққа.
Тобуткашинг кимлар, билгин,
Чоғ бўлсанг ҳам салом бергин.*

*Дард келганда сабр қилгин,
Нақд келганда шукр қилгин.
Бу дунё бир синов, билгин,
Доғ бўлсанг ҳам салом бергин.*

ДУГОНАЛАР

*Дугона қизлар, келинг даврага,
Биз ўйнайверамиз ҳатто доирага.
Тинчлик куйимиз оламга ёққан,
Сиз чаққонми, биз чаққон.*

*Қушиғимиз куйимизга ярашар,
Завқланишиб дўстлар бизга қарашар.
Қалб сўзлари бугун дарёдек оқар,
Сиз чаққонми, биз чаққон.*

*Келинг, бирга куйлашайлик, дугона,
Яна бизга кулишмасин бегона.
Гул беришди бизга бугун бир дона,
Келгусида сиз енгасиз, дугона.*

* * *

Дилимни вайрон этди
Икки қиз, икки қирмиз.
Лол қилиб ташлаб кетди,
Қолдик юрак иккимиз.

У ёнда юрак, бир ёнда мен,
Зориқиб қолдик, иккиси бўлак.
Алдаб мени ташлаб кетдинг сен,
Энди ҳеч кимга ишонмасам керак.

Ҳаловатим йўқ, йўқдир оромим,
Дардларимга ҳеч топмадим даво.
Ишон менга, ишон, нигорим,
Лек ёмонликни кўрмасман раво.

Фақат бошларинг омон бўлса бас,
У ҳам меҳр излаган юрак.
Зорларим бору менга зор эмас,
Айтинглар, мен кимга ҳам керак.

Муҳаббатим софдир, ишонинг,
Уялтириб қўймайман сизни.
Хаёлимда фақат ўзингиз,
Алмаштирмам ҳеч кимга сизни.

Бахтли бўлсак бўлди ҳаётда,
Бевафолик бўлсин бегона.
Агар сизга хиёнат қилсам,
То қиёматгача қолай ягона.



* * *

Суратинг қўлимда, йўқ қўлимдамас,
Юрак қатларида қолди, нигорим.
Юрагим қалбимда, қўлимда эмас,
Сен уни олиб кетдинг, нигорим.

Кўзимга кўринса бирон бир малак,
Қалбим зор йиғлайди, аламда юрак.
Бу не кўргиликдур, менга, эй фалак,
Менга азоб борму бундан ҳам бўлак.

Гуллар териб келдим мен боғларингдан,
Ҳар бир япроғида сенинг суратинг.
Гулларни бағримга боссам мен аста,
Суратинг қўлимда, юрагим хаста.

Тунлари қўёлмасман ёстиғимга бош,
Уйқу бегона, оромларим йўқ.
Гулларга термуламан, кўзларимда ёш,
Суратинг қўлимда, нигоҳларинг ўқ.

* * *

Ҳар сафар сенга боқсам, нилуфар,
Бутун ер юзини сув босса дейман.
Заминда жой йўқ бўлса сенга,
Кафтимда кўтариб кўкартсам дейман.

Доимо ёз бўлсин сенга, нилуфар,
Орзумандлар бўлсин сенга ҳавасда.
Шоирлар байтларин битиб ҳар сафар,
Пайваста қалб билан қайтишсин аста.

ИСТИҚЛОЛИНГ МУБОРАК!

*Балоғатга етди Истиқлол,
Дадил қадамлар ташлайди энди.
Юртимга кулиб боқсин-да иқбол,
Мустақил элим, давронинг келди.*

*Бебошлигинг орқага ташла,
Элингга қайт, шеригинг бошла.
Жаҳон таниган алларимиз бор,
Ўтиб кетди қанчалар ғубор.*

*Тарихинг узоқ, истиқлолинг ёш,
Иймонинг бош, Исломинг бош.
Ватанга зор бўлиб тўкмагин ёш,
Ёшлар диёрига қўшгин энди бош.*

*Оталарга тенглашган диёр,
Ўн олти ёшинг муборак бўлсин.
Дунё таниди, қанча дўсту ёр,
Истиқболинг абадий кулсин.*

*Жалолиддин туғини олдинг қўлингга,
Хизр йўлдош бўлсин доим йўлингга.
Соҳибқирон камари бугун белингда,
Муносиб бўлгин энди элингга.*

КУЙ СЕҲРИ

*Тунлари сени изладим, наво,
Дардлларимга ўзинг бўл даво.
Бўғзимга тиқилди ҳаво,
Дард қайдан келди бедаво.*

*Куй бўлиб инграндинг, сен нола,
Бошимга ёғилса, ноладан жала.
Сабрим чидаб қилсам ҳафсала,
Наво юрагимга беради даво.*

*Наво излаб ахтармагин соз,
Даво излаб қалбинг тингла оз.
Юрак нолаларин тингласанг бир оз,
Қалбимдан бошланар мумтоз.*

*Куй сеҳридан болга айланди оғу,
Дараларни йиғлатди қояда оғу.
Сенга интизор бўламан гоҳи,
Сен борсан, кетади юрагим оҳи.*

*Баъзан мен билан бирга йиғладинг,
Баъзан созингга сен ҳам сиғмадинг.
Баъзан уйқумда ҳам хўрсиниб,
Созга қўшилиб мен ҳам йиғладим.*

ЯРИМ БАХТИНГИЗ ТЎЛСИН, ОНАЖОН!

*Сизга дoston бита олмадим,
Юрак сўзларимни айта олмадим.
Қадоқ қўлингизга тикилиб туриб,
Сабрдан бошқасига ўта олмадим.*

*Кошона қасрингиз бир ўтов бўлди,
Қувониб минганингиз от-улов бўлди.
Қалбингизда ўтин бир олов бўлди,
Аллоҳ ёру, баъзи дўстлар ёв бўлди.*

*Ўчоқ ўчса ҳам, чироқ ўчмади,
Дардлар кетди, фироқ кўчмади.
Қалбингизда дард-қуроқ ўчмади,
Аллоҳ, қўлласин, чироқ ўчмайди.*

*Қизлар — бахтингиз, ўғил — тахтингиз,
Отam руҳи шод, бор не аҳдингиз.
Аллоҳдан умидин узмаган, онам,
Тўлсин-да энди, ярим бахтингиз.*

Мундарижа

<i>Бир кун келиб севиб қоларсиз</i>	4
<i>Зулфинг билан ўйна бирпас</i>	5
<i>Азиз онажонлар</i>	6
<i>Чирчиқ</i>	7
<i>Бундай даврон қайда бор эди</i>	8
<i>Хўрлик кўрмайлик</i>	9
<i>Бори билан Аллоҳ асрасин</i>	10
<i>Истиқлол абадий келди</i>	11
<i>Умидвор бўлиб яшайман</i>	12
<i>Ғофиллардан огоҳ бўлинг</i>	14
<i>... Ярим йўлда қолиб кетди</i>	15
<i>Муҳаббатинг сочилиб кетди</i>	16
<i>Мозийга қара</i>	17
<i>Кўрмаганнинг кўргани қурсин</i>	18
<i>Тўртликлар</i>	19
<i>Тушда изладим</i>	20
<i>Муҳаббат</i>	21
<i>Тўртликлар</i>	22
<i>Севишингни ўзи ярим бахт</i>	23
<i>Бола — азиз, одоби ундан азиз</i>	24
<i>Отам армонлари</i>	25
<i>Тўртликлар</i>	27
<i>Ҳаё либосингиз бўлсин</i>	28
<i>Тоғжик қизлари</i>	29
<i>Қозоқ қизлари</i>	30
<i>Ярим бахтинг тўлдиргим келди</i>	31
<i>Ўзинг асра</i>	34
<i>Сен ёғдусан</i>	35
<i>Умид юлдузи</i>	36
<i>Укажонлар</i>	38
<i>Сабрсиз аёл</i>	41
<i>Тўртликлар</i>	42
<i>Ҳар тунингни қадр қилгин</i>	44
<i>Тўртлик</i>	45

<i>Чиройга учма</i>	46
<i>Баҳор келди</i>	47
<i>Сочлари узун қизни севаман</i>	49
<i>Синглингиздан хабар олинг</i>	50
<i>Мажнунтол</i>	51
<i>Чимилдиқда эгилди бош</i>	52
<i>Эҳтиёт бўл аёлларга</i>	53
<i>Капалак</i>	54
<i>Севгини хор қилма</i>	55
<i>«Нанайга бор»</i>	56
<i>Қалдирғоч</i>	57
<i>Қалбинг кумуш бўлсин</i>	58
<i>Юртим қизлари</i>	63
<i>Тонг</i>	64
<i>Ўр йигитлар</i>	65
<i>Орли қиз</i>	66
<i>Зулфинг қани,</i> <i>Зулфинг ноласи</i>	67
<i>От минган йигитлар</i>	68
<i>Салом бергин</i>	69
<i>Дугоналар</i>	70
<i>Истиқлолинг муборак</i>	74
<i>Куй сеҳри</i>	75
<i>Ярим бахтингиз тўлсин, онажон!</i>	76

Адабий-бадиий нашр

ЙЎЛДОШ ЖУМАЕВ

**БИР КУН МЕНИ
СЕВИБ ҚОЛАСИЗ**

Шеърлар

Муҳаррир: Ю. ЖЎРАЕВ

Бадиий муҳаррир: Б. АБДУНАЗАРОВ

Мусахҳиҳ: Х. НУРМУҲАММЕДОВА

Матн терувчи: ШАҲНОЗА САЛИЕВА

*Босишга 08.10.2007 йилда рухсат этилди.
Бичими 84x108 1/32.
Босма табағи 2,5. Шартли босма табағи 4,20.
Адади 1000 нусха. Буюртма № 234.
Баҳоси келишилган нархда.*

*«Янги аср авлоди» нашриёт-матбаа марказида тайёрланди.
«Yoshlar matbuoti» босмахонасида босилди.
700113. Тошкент шаҳри. Чилонзор-8, Қатортол кўчаси 60.*